

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Sužbene novine Zeničko-dobojskog kantona“, broj: 7/10), na prijedlog Ministarstva za obrazovanje, nauku, kulturu i sport, Vlada Zeničko-dobojskog kantona, na 36. sjednici, održanoj dana 19.12.2019. godine, d o n o s i

## ZAKLJUČAK

### I.

Utvrđuje se Prijedlog Zakona o izmjeni i dopuni Zakona o Javnoj ustanovi Univerzitet u Zenici.

### II.

Prijedlog Zakona iz tačke I. ovog zaključka upućuje se u dalju skupštinsku proceduru, po skraćenom postupku.

### III.

Zaključak stupa na snagu danom donošenja.

**PREMIJER**

***Mirza Ganić***

Broj: 02-\_\_\_\_\_ /19  
Datum, 19.12.2019. godine  
Z e n i c a

DOSTAVLJENO:

1x Ministarstvo za obrazovanje, nauku, kulturu i sport,  
1x Stručna služba Skupštine,  
1x a/a.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na \_\_\_\_\_sjednici, održanoj dana \_\_\_\_\_ 2019. godine, donosi

**ZAKON O IZMJENI I DOPUNI ZAKONA  
O JAVNOJ USTANOVI UNIVERZITET U ZENICI**

**Član 1.  
(Izmjena člana 11.)**

U Zakonu o Javnoj ustanovi Univerzitet u Zenici – Prečišćeni tekst („Službene novine Zeničko-dobojskog kantona“, broj: 1/18 i 10/18), član 11. mijenja se i glasi:

**„Član 11.**

Univerzitet u svome sastavu može imati fakultet/akademiju kao ustanovu u svojstvu pridružene članice koja ima status pravnog lica i ima pravo organizirati nastavu prvog, drugog i trećeg ciklusa studija u skladu sa zakonom i uslovima utvrđenim ugovorom.

Ustanova iz stava (1) ovog člana može biti pridružena članica pod uslovom da postoje opravdani akademski razlozi za njeno djelovanje u okviru Univerziteta.

Poslovi i odnosi iz nadležnosti Univerziteta i pridružene članice uređuju se posebnim ugovorom u skladu sa odredbama ovog Zakona.

Fakultet kao pridružena članica Univerziteta ima nadležnost organizacione jedinice u izvođenju univerzitetskih studija i razvijanju stručnog i naučnog rada u jednom ili više naučnih i stručnih području, a akademija kao pridružena članica Univerziteta ima nadležnost organizacione jedinice u izvođenju univerzitetskih umjetničkih studija, te razvijanju umjetničkog stvaralaštva i naučnoistraživačkog rada na području umjetnosti.“

**Član 2.  
(Novi član 11.a)**

Iza člana 11. dodaje se novi član koji glasi:

**„Član 11a.**

Islamski pedagoški fakultet je pridružena članica Univerziteta.“

**Član 3.  
(Stupanje na snagu)**

Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: \_\_\_\_\_ /19.

PREDSJEDAVALAČI

Datum, \_\_\_\_\_ 2019. godine  
Zenica

*Ćazim Huskić*



## Obrazloženje

### Pravni osnov:

Pravni osnov za donošenje ovog zakona sadržan je u članu 37. stav 1. tačka f) Ustava Zeničko-dobojskog kantona.

### Razlozi za donošenje:

Imajući u vidu da je osnivač Islamskog pedagoškog fakulteta Islamska zajednica u Bosni i Hercegovini, zbog čega mu se status i razlikuje od statusa ostalih organizacionih jedinica Univerziteta u Zenici čiji je osnivač Skupština Zeničko-dobojskog kantona, bilo je potrebno da se i Zakonom o Javnoj ustanovi Univerzitet u Zenici uredi status Islamskog pedagoškog fakulteta kao pridružene članice u sastavu Univerziteta u Zenici.

### Obrazloženje pojedinih pravnih rješenja

Predložena izmjena člana 11. prije svega općenito definiše pojam pridružene članice, čiji pojam nije definisan u važećem tekstu Zakona o Javnoj ustanovi Univerzitet u Zenici, što dalje stvara preduslov da se dopunom sa članom 11a., uredi status konkretno Islamskog pedagoškog fakulteta u sastavu Univerziteta u Zenici, kao njegove punopravne akademske članice sa statusom pridružene članice, ali i potencijalno drugih pridruženih članica.

Imajući u vidu da se radi o izmjeni jednog člana (član 11.) i dopuni jednim članom (član 11a.), te da nije u pitanju složen i obiman zakon, predlažemo da se isti razmatra **po skraćenom postupku.**

### Finansijski pokazatelji:

S obzirom na to da se predloženom izmjenom i dopunom Zakona o Javnoj ustanovi Univerzitet u Zenici – Prečišćeni tekst dodatno uređuju odnosi između Islamskog fakulteta u Zenici i Univerziteta u Zenici, donošenje ovog zakona, prema stajalištu obrađivača, neće podrazumijevati dodatna izdvajanja u odnosu na već planirana sredstva u Budžetu Kantona za 2019. godinu, u skladu sa izjavom o fiskalnoj odgovornosti i pribavljenim mišljenjima koja se nalaze u prilogu.

Stoga i predlažemo usvajanje Prijedloga Zakona o izmjeni i dopuni Zakona o Javnoj ustanovi Univerzitet u Zenici, po skraćenom postupku.